

Romans
Leta
Paul Mo Ulia
Isana Mara
Rome
Puku Nike

Paul mo uli leta nike isana mara Rome. Rome enia taon tavera na varama hin pongi atu. Mo levosahi na kalesia ea (15.22–16.21). Mo vereia isara mara Iesu mo vironia vara enia i pa nona volitusi isara (1.1) mo lavi na retisohai matea ‘— matan enia suiha God mata juri na tamlohi tari sei la rasua, tiroma isana Jew moiso i pa isana tamlohi řořoha.’ (1.16). Paul mo vereia mara tamlohi tari la hehe (3.23). Pani mo vai na malele mata vai na tamlohi la tataholo na nahona:

‘Matan tamlohi tari la vai na hehe, la lo toho asau na hina řuhuřuhu sei non God hasena, ale God mo avulahi vara i vai na tamlohi la tataholo na nahona na nona řomřuhu purongo, mo vaia na malele mata volituhu hin Kristo Iesu, enia sei, God mo taua na nahořa, řaena mo volituhu na talai lolokoru non God mata hehe, ale rasua enia malele sei tamlohi la eři lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai.’ (3.23–25).

Paul mo vujangia vara rasua nike mo sohen rasua atu non Abraham tuai (4.13). Ale nake vara tamlohi la mai kalesia, la pa mauri usuri na suiha Tanumen God (8.1–27). God mo sile na suiha hai isana nona tamlohi mata hahau usuri na masalona (12.1–13).

Hin Leta Nike

1. Paul Mo Vujangi Na Retiřuhu (1.1–17)
2. Tamlohi Tari La Ori Na Hehe (1.18–3.20)
3. God Mo Vai Na Tamlohi La Tataholo Na Nahona (3.21–4.25)
4. Mauri Paro Nona Tamlohi (5.1–8.39)
5. Vujangi Mata Tavitavuın Israel (9.1–11.36)
6. Mauri Paro Nona Kalesia (12.1–15.13)
7. Vavahinau Non Paul, Isoiso Retireti (15.14–16.27)

Paul Mo Sile Na Nona Retioloolo

¹ Enau Paul, volitusi non Křisto Iesu matea, enia mo toviau vara a vahařule, mo tapuhiau vara a retivujavujangi na Retiřuhu non God. ² Mo retitauhi hin Retiřuhu sei tuai moiso na reti nona přovet na Retitapu mo tapu, ³ mo lo vereuli Natuna, enia mahapin Supe David usuri na malele tamlohi, ⁴ ale God mo vujangia vara enia Natun God na suihan Tanume Tapu na nona mele turu na mateia, Iesu Křisto nořa Moli, ⁵ ale hinia, kama lo lavi na řomřuhu peresi na hija řuhu mata vahařule matan vara kama eři tiroma na tamlohi vara la oloolo usuri na mauri rasua, matan vara hijana i pa aulu na tamlohi řořoha, ⁶ kamim sohena, God mo tovi kamim vara ha mai tamlohi non Iesu Křisto.

⁷ Isan la haratu tari la lo toho Rome sei God mo opoira, ale mo tovira vara la mai nona tapuhi:

Romřuhu peresi na tamata non God Tamařa peresi Moli Iesu Křisto la mai isamim.

Retiřuhu Non God

⁸ Tiroma, na opoia vara a vere meje isan noku God matamim hin Iesu Křisto, matan tamlohi na jara tari na varama la lo sorahi na nomim

rasua. ⁹ Matan God sei na lo volitusi isana na mauriku usuri na Retiřuhu matan Natuna, enia noku tuetueni sei mo levosahia vara na lo vere kamim tarea ¹⁰ na noku usiusi, tarea na lo usia vara te masapa na masalon God vara a eři mai isamim. ¹¹ Matan tuai moiso, řomiku taverna na opoia vara a hite kamim, vara Tanume Tapu i eři sile kamim hin te otori na limaku matan vara i eři řilangi na maurimim hinia, ¹² na lo řaramia vara, enřa řa eři řomřomi řilangi mata nořa rasua, nomim peresi na noku.

¹³ La vorai peresi na vevorai, na opoia vara ha levosahia vara na opoia vaha visa moiso vara a mai, pani mo tikeli nake, mo sopo lo te masapa, matan vara a eři hite na vua nomim rasua sohen na hitea moiso isana tamlohi řořoha tinatinapua. ¹⁴ God mo tauau moiso vara a pa tueni la haratu la lo retireti na leo mara Greek peresi la haratu la tamlohi řořoha, ale isan la haratu la lelevosahi peresi la haratu la rongorongo vono. ¹⁵ Matana, enau na opoia mo taverna jea vara a retivujavujangi na Retiřuhu isamim sei ka lo toho Rome.

¹⁶ Matan enau na sopo mahanuhanu na Retiřuhu, matan enia suiħan God mata juri na tamlohi tari sei la rasua, tiroma isana Jew moiso i pa isana tamlohi řořoha. ¹⁷ Matan hin Retiřuhu sei, malelen God mo vaia vara tamlohi la mai la tataholo na nahona, mo malue na jara taverna, enia mata rasua purongo, matan la ulia moiso vara, ‘Haratu mo tataholo na nahon God la pa mauri usuri na malele rasua purongo’. *Hab 2.4*

Lolokoru Non God Mata Hehe

¹⁸ Matan God mo lo vujangi na nona talai lolokoru mata hehe na tuka mo sinai na varama mata posposi varama tari peresi na posposi hehe tari nona tamlohi, ale matan nora posposi hehe sei mata turuhoro na retivaraʻuhuhu vara i malue na jara tavera. ¹⁹ Matan sava hinau tamlohi la eʻi levosahia hin God mo memera isara, matan God mo vujangia isara moiso. ²⁰ Matan ʻuhuhuhun God sei nona hasena la lo luhu sohen harihi; nona suiha matan tui tui peresi mauri atu sei enia non God hasena. Ale la hinau sei tamlohi la eʻi hitevosahira matan la memera purongo hin la hinau atu God mo vaira na tapulo rani sei mo vai na varama. Ale matan haratu, tamlohi la sopo eʻi vereva vara God mo sopo toho.

²¹ Matan hina purongo vara la levosahi God moiso, pani la sopo hasohasoa vara enia God teni la sopo vere meje isana, ale ʻomira la mai la putu, ale mapura la rongorongo vono la mai la ʻroʻroha, ²² la vereva lara la lelevosahi, pani la mai la rongorongo vono, ²³ la sopo lotu na ʻuhuhuhun God sei i sopo eʻi tihai, pani la lo lotu na hinau sohena tamasi sei la vaira sohena tamlohi peresi na maji avuavu, peresi na maji palo vati, peresi na maji haraho sohena mata teni malupa, enira mo isoiso la pa tihai!

²⁴ Ale matana, God mo silera la vano na masalo mapura, ale la usuri na posposi lumiha, la vai na hina mahanuhanu na epera hasera, ²⁵ matan la jeni na retivaraʻuhuhu hin God mata halu, ale la lo lotu ale la volitusi nona hinau God mo vaira, pani mo sopo isan God sei mo vaira, enia hasena mo tataholo vara tamlohi la hasohasoa na rani tui tui

tarea! Amen.

²⁶ Matan harihi, God mo silera la vano na nora opoia mata posposi mahanuhanu, matan nora haʻrai la jeni na posposi tataholo nona haʻrai matan la lo hase lavilavira. ²⁷ Ale lamane sohena la tinarihi na posposi tataholo peresi na haʻrai, matan posposi mata opoi na lamane mo jeu na masalora tinatinapua, lamane la vai na hina mahanuhanu peresi na lamane, ale la hani na vua pulara vetali mata nora lejileji.

²⁸ Ale matan la ʻrohu vara la ʻromʻromi God, ale God mo silera na ʻromʻromi nona maji matan vara la vai na hinau mo sopo tataholo vara tamlohi la eʻi vaira. ²⁹ La maʻivi na posposi tari la sopo tataholo, la lo vaivaileu, la lo ʻromusuri, la sasati, la maʻivi na mereimerei, la lo vilimatei na tamlohi, la lo hitesatihi, la lo halu, la lo vaisatihi na tinapua, la lo sorasora tamlohi, ³⁰ la lo retiʻeʻren, la ʻrohu hin God, la lo vataʻa, la lo mangisi, la lo retihapahapa, la lo ʻromʻromi, ale la aleale malele paro mata la vai na hina sasati hinia, la sopo oloolo hin tamara teni tinara, ³¹ ʻromira mo vono, la lo tope na nora retitauhi, mo sopo te nora opoia, la sopo ʻromopoi te tinapua. ³² Hina purongo vara la levosahia mo ʻruhu moiso vara God mo pete tau na ratileu moiso vara tea mo topea i pa mate matana, enira la sopo vaira purongo, pani la retituetueni la haratu la lo vaira.

2

God I Pa Ari Na Nom Hehe

¹ Ale nake, mo sopo te hinau hatea vara o eʻi halu hinia tapala, kamim mo isoiso sei ka lo ari

na tinapua. Matan vara ko lo ari na tinapua, ko lo hasem ariho matan engko ko lo vai la hinau atu na lo vereā moiso vara tamlohi la lo vaira. ² Ra levosahia vara talai non God mo lo jovi isan la haratu la lo vai la hinau sei, ale enia mo tataholo. ³ Tapala, engko sei ko lo ari la haratu la lo vai la hinau sei, ko řom vara o pa eři jelu na talai non God, pani i pa sohena sava matan engko sohena ko lo vaira? ⁴ Ko lo řomřomi purongo na nona řomřuhu peresi na nona řompurongo peresi na nona řomperavu tavera isam, pani ko sopo levosahia vara nona řomperavu mo lo sileho na masapa vara o posi na nom hehe.

⁵ Pani matan mapum mo řilangi, ale ko řohu vara o posi, ko lo hasem takonahi na nom talai matan rani aria atu sei God i pa vujangi na nona talai lolokoru mata hehe usuri na nona posposi tataholo hinia. ⁶ God i pa ari na tamlohi i tataholo na nora vavahinau: ⁷ God i pa sile na mauri tui isan la haratu la lo řomperavu vara la vai na vavahinau řuhu, ale la lo ale na hasohaso peresi na oloolo tavera peresi mauri atu sei i pa sopo eři tihai hin te rani; ⁸ pani isan la haratu la lo vai na masalora purongo, ale la sopo oloolo na retivarařuhu, pani la lo oloolo na posposi mo sopo tataholo na nahon God, enira la pa lavi na talai lolokoru non God mata hehe peresi na nona lolokoru sasati. ⁹ Ale tamlohi tari sei la lo vai na vavahinau hehe la pa lavi na rani řilangi peresi na rani sasati, isana Jew tiroma moiso i pa isana tamlohi řořoha, ¹⁰ pani God i pa sile na hasohaso, oloolo peresi na tamata isana tamlohi tari sei la lo vai na vavahinau řuhu, isana Jew tiroma moiso

i pa isana tamlohi řořoha, ¹¹ matan God mo sopo tametame tea.

¹² God i pa sile na talai isana tamlohi la sopo Jew vara la hehe, hina purongo vara la sopo lo lavi na nona leu. Ale i pa sile na talai isana Jew vara la hehe matan nona leu mo lo pisuhi na nora hehe.

¹³ Matan mo sopo la haratu sei la lo rongo na leu purongo mo vaira la tataholo na nahon God, pani la haratu sei la lo vai na sava leu mo vereea, enira natu la tataholo na nahon God. ¹⁴ Matan vara la tamlohi řořoha sei la sopo lavi na leu, pani la lo vai na sava leu mo vereea, mo vujangia vara leu mo lo toho hinira moiso, hina purongo vara la sopo lo lavi na leu. ¹⁵ La lo vujangia vara sava hinau leu non God mo vereea, mo lo toho na mapura moiso, matan řomira sohena mo vereulia isara vara la lo vai na hina řuhu teni te hina hehe, ¹⁶ hin rani atu usuri noku Retiřuhu sei mo lo vereea vara God mo ari na hina luhu nona tamlohi hin Kristo Iesu.

Leu Non God Mo Reti Isana Jew

¹⁷ Pani vara ko lo vereea vara engko Jew matea, ale ko lo turu na leu, ale ko lo hapahapa vara ko levosahi God, ¹⁸ ale vara ko levosahi na masalona, ale ko lo avulahi na sava hinau la řuhuřuhu jea matan ko lo lavi na lelevosahi na leu, ¹⁹ ale vara ko levosahi mamahunia vara engko tamlohi tiroma na matavuso matea, ale lamu matea isan la haratu na řořoha, ²⁰ ale vara engko tamlohi matea mata vujangi la haratu la sopo rongovosahi, ale tamlohi vujangi na natuvarihi matan ko lavi vevuhi na lelevosahi peresi na retivarařuhu na leu, ²¹ ale vara ko lo vujangira sohena, mata sava ko sopo hasem vujangiho? Ko lo retivujavujangi vara

tamlohi la pa sopo vavanaho, pani engko, ko lo vavanaho teni mo vono? ²² Engko sei ko lo vereea vara mo sopo tataholo vara tamlohi la vaivaileu peresi na tinapua mo lahi moiso, ko lo vaivaileu peresi na tinapua mo lahi moiso teni mo vono? Ko lo vereea vara ko sopo lotulotu vono, pani ko lo vanaho na hinau na lolo temple nona tamasi teni mo vono? ²³ Engko sei ko lo hapahapa na leu, ko lo topea, ale ko lo komo na hijan God matana. ²⁴ Matan sohen la ulia vara, ‘Tamlohi řořoha matuvana na varama la lo veresatihi na hijan God matamim’.

Isa 52.5

²⁵ Matan posposi taiřalihi mo řuhu purongo vara ko oloolo na leu, pani vara ko lo tope na leu, nom taiřalihi enia hina purongo. ²⁶ Ale matana, vara tamlohi matea mo sopo taiřalihi, pani mo lo tauri na vujangi mata leu, ko hitea vara God i pa hitea vara posina mo tataholo hin la haratu la taiřalihi teni mo vono? ²⁷ Ale matana, tamlohi atu mo sopo taiřalihi, ale mo lo tauri na leu, enia i pa vereea vara talai i pa jovi isam sei ko taiřalihi sei ko lavi na leu, matan engko natu ko lo tope leu atu.

²⁸ Matan engko mo sopo Jew matea tataholo vara tamam enia tinam enira Jew teni matan engko ko lavi na taiřalihi na epem. ²⁹ Mo vono. Jew tataholo matea enia haratu mapuna mo tataholo na nahon God. Ale taiřalihi varařuhu enia mo sopo taiřalihi na epe, pani sava Tanume Tapu mo vaia na mapum. Tamlohi sohena, mo lo ale hasohaso atu God mo lo silea, mo sopo hasohaso sei tamlohi la lo silea.

3

Retitauhi Non God La Varaʻuhu

¹Vara mo sohen haratu, sava mo ʻuhu natu vara engko Jew matea? Teni sava natu mo ʻuhu na taiʻalihi? ²Varaʻuhu, God mo leʻuhu na Jew na malele matuvana, tiromara enia God mo sile na nona vereulia isara. ³Varaʻuhu, tatuara la tope na nora retitauhi, pani nora posposi mata tope na retitauhi i pa vai na retitauhi non God i vano hina purongo teni i vono? ⁴I vono! Tamlohi tari enira tamlohi halu, pani God mo lo varaʻuhu, sohen la ulia vara, ‘Nom reti la vujangia vara engko ko tataholo, ale engko o pa jeu na nora retituvai na court’.

Psa 51.4

⁵Pani vara hai la lo verea lara nora hehe mo sile God na masapa vara i pa vujangi na nona posposi tataholo, ʻra pa ʻrarami ʻromʻromi atu sohena sava? Vara mo sopo tataholo vara God i sile na nona talai lolokoru mata hehe isara teni mo vono? Na lo retireti usuri na ʻromʻromi tamlohi nahai. ⁶I vono! Vara sohena, God i pa eʻi ari na varama sohena sava? ⁷Pani tea la pa verea vara, ‘Vara noku halu mo lo vujangia vara reti non God mo varaʻuhu sohena sava, ale mo lo lavi na hasohaso matana, mata sava natu, na lo lavi na talai sohena tamlohi hehe matea?’ ⁸Ale mata sava ʻra sopo eʻi verea vara, ‘Mo ʻuhu vara ʻra vai na hina sasati matan vara hina ʻuhu i eʻi mai matana.’ Matan tea la lo retireʻren hin kamam lara kama lo vujangia sohena. Pani hara talai sei God i pa silea isara matana i pa tataholo.

Tamlohi Tari La Hehe

⁹ Nake i pa sohena sava? Kamam Jew kama
řuhu kama jeu na tinapua teni mo vono? I vono,
matan řa pete vujangia moiso vara tamlohi tari,
Jew teni tamlohi řořoha, la lo toho na ruhuru
suiha hehe, ¹⁰ mo sohen la ulia vara,
'Mo sopo tea i tataholo,

mo vono, mo sopo te hatelete.

¹¹ mo sopo tea i lelevosahi;
mo sopo tea i lo ale God.

¹² Tamlohi tari la vahaři hinia,
enira mo isoiso la sopo mele řuhu matan te
hinau;
mo sopo tea i vai te hina řuhu,
mo vono, mo sopo te hatelete.'

Psa 14.1–3; 53.1–3

¹³ 'Nora retireti mo řanga
sohena pona taptap roi matea;

la vai na memera la halu.'

Psa 5.9

'Nora reti mo sohena poison mata
mata sasati mo lo toho
na jingora.'

Psa 140.3

¹⁴ 'Jingora mo mařivi na lesati
peresi na lolokoru.'

Psa 10.7

¹⁵ 'La tamlohi akerihi la tatamahu moiso mata vili
na tamlohi;

¹⁶ Sava jara la vano hinia,
la vaikomokomoa,
ale rongohaji mo vora,

¹⁷ ale malele mata tamata
enira la sopo levosahi te hinau hinia.'

Psa

59.7–8

¹⁸ 'Mo sopo te matahu matan God
na nora vavahinau.'

Psa 36.1

¹⁹ Ale nake řa levosahia vara sava hinau leu mo vereia, mo vereia isan la haratu la lo toho na leu matan mo vai na tamlohi tari la tapanono, ale mo vujangia vara tamlohi tari na varama la pa toho na ruhuruhu talai non God. ²⁰ Matana, mo sopo te tamlohi vara i eři tataholo na nahon God matan enia mo lo usuri na leu. Matan leu mo sile na lelevosahi mata hehe.

Křisto Mo Lavi Na Nořa Talai

²¹ Pani nake, malele tamlohi mata la mai la tataholo na nahon God mo lo toho na jara tavera, pani leu mo sopo toho na lolona, o pa hitea vara Leu non Moses peresi na retireti nona přovet la lo vereulia ²² sohenia sava God mo lo vujangi na nona posposi tataholo na malele rasua. Tamlohi tari la tau nora rasua hin Iesu Křisto la mai la tataholo na nahon God matan God mo sopo ase na tamlohi, ²³ matan tamlohi tari la lo vai na hehe, la toho asau na hina řuhuřuhu sei non God hasena, ²⁴ ale God mo avulahi vara i vai na tamlohi la tataholo na nahona na nona řomřuhu purongo, mo vaia na malele mata volituhu hin Křisto Iesu, ²⁵ enia sei, God mo taua na nahořa, řaena mo volituhu na talai lolokoru non God mata hehe, ale rasua enia malele sei tamlohi la eři lavi na vuan vavahinai sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai. ²⁶ Nake mo vaia matan vara i vujangia vara nona aria mo tataholo, ale mo tataholo vara enia i vai na tamlohi la tau na nora rasu hin Iesu, ale la mai la tataholo na nahona.

²⁷ Ale, hare natu i eři retihapahapa i vereia vara mo tataholo mata nona vavahinai? I pa sopo tea! Mo mai mata sava leu? Matan řa lo oloolo na

leu? Mo vono, pani matan řa usuri na leu mata rasua. ²⁸ Matan kama lo vereā vara tamlohi la mai la tataholo na nahon God mata rasua, mo sopo matan la lo ololo na leu.

²⁹ Pani God enia God nona Jew purongo teni mo vono? Enia God nona tamlohi řořoha teni mo vono? Enjora, enia God nona tamlohi řořoha, ³⁰ matan God enia mo matelete. Enia i pa vai la haratu la taiřalihi peresi la haratu la sopo taiřalihi la tataholo na nahona mata rasua. ³¹ Ale, vara mo sohena, rasua mo vai na suiĥan leu atu mo isoiso teni mo vono? Mo vono, matan kama lo vereā vara leu mo tataholo.

4

Rasua Non Abraham

¹ Ale vara mo sohena, řa pa vere na sava matan hinau sei piřa Abraham mo vileia tuai? ² Matan, vara Abraham mo tataholo na nahon God mata nona vavahinau, enia i pa hapahapa matana. Pani i sopo eři hapahapa na nahon God. ³ Retitapu mo vere na sava matana? ‘Abraham mo rasu God, ale God mo vereā vara enia mo tataholo na nahona matana’.

Gen 15.6

⁴ Ale isana tamlohi voko matea, volina mo sopo hina silesilea matea, pani enia voli nona voko. ⁵ Pani isan haratu mo sopo vai te voko, pani mo tau na nona rasu hin God sei mo eři vai na tamlohi varama la mai la tataholo na nahona, ale God mo vereā vara rasua non tamlohi atu mo vaia mo mai mo tataholo na nahona.

⁶ Mo sohen supe David mo vereā matan avulaĥi tavera non haratu sei God mo ĥitea vara mo tataholo na nahona, mo sopo matan te hinau enia mo vaia:

⁷ ‘Avulahi taverna isan la haratu
God mo ŋomi na nora vaivaileu,
ale mo tatavuhi na nora hehe;

⁸ avulahi taverna isan tamlohi sei
Moli i pa sopo evi na nona hehe hin te rani.’
Psa 32.1–2

⁹ Avulahi taverna nika enia non la haratu la
taiŋalihi purongo? Mo vono, avulahi sei enia
non la haratu la sopo taiŋalihi peresi la haratu
la taiŋalihi, matan kama lo vereva vara, ‘God mo
vereva vara Abraham mo tataholo na nahona mata
nona rasua purongo’. *Gen 15.6*

¹⁰ God mo pa vaia sohena isan Abraham sohena
sava? Mo vaia tiroma teni hitahu moiso mo pa
taiŋalihi? Mo sopo hitahu, pani tiroma na nona
taiŋalihi.

¹¹ Mo lavi na taiŋalihi sohena matamata matea
mata vujangia vara enia mo tataholo mata nona
rasua hin rani atu mo sopo lo taiŋalihi. Enia matan
vara God i vaia i tama tamlohi tari sei la rasua,
pani la sopo taiŋalihi, matan vara God i pa vaira la
tataholo na nahona sohen Abraham, ¹² ale mo vai
Abraham mo taman la haratu la taiŋalihi, mo sopo
mata taiŋalihi purongo, pani matan la lo hahau
usuri na malele rasua non tamaŋa Abraham hin
rani atu mo sopo lo taiŋalihi.

¹³ Matan retitauhi sei God mo silea isan Abra-
ham peresi na taniaa mo vereva vara varama i
pa nora, mo sopo mai mata leu, pani mata rasua
sei mo vai na tamlohi la tataholo na nahon God.
¹⁴ Matan, vara la haratu la lo usuri na leu la lavi na
vuan retitauhi sei, rasua enia mo sopo te suihana,
ale retitauhi atu mo vano hina purongo. ¹⁵ Matan
leu mo lavi na talai lolokoru non God mata hehe

mo mai isana tamlohi, pani vara i sopo lo te leu, i pa sopo te hehe.

¹⁶ Mo pa sohena matan mo turu na rasua purongo, matan vara sava retitauhi mo vereaa, mo mai mata řomřuhu, mo turu řilangi mata taniana tari, mo sopo isan haratu mo lo usuri na leu purongo pani isan haratu mo rasua sohen Abraham mo lo rasua, enia tamařa enřa mo isoiso,

¹⁷ sohena la ulia vara, ‘Enau na viřoniho vara engko o pa tama tamlohi jara matuvana’. *Gen 17.5* Ale God mo hitea vara Abraham mo rasua vara enia i eři sile na mauri isana mate, ale mo retireti purongo ale hinau sei la sopo lo toho la pala.

¹⁸ Abraham mo lo řomtoho, hina purongo vara mo sopo levosahia vara i pa sohena sohena sava, pani mo lo řomtoho vara i pa tama mara jara matuvana usuri na sava God mo vereaa isana mara, ‘Ale taniam la pa matuvana sohena vitusarasara’. *Gen 15.5*

¹⁹ Nona rasua mo sopo jovi, hina purongo vara epena mo vajiaha mariviti i pa mate purongo matan taunina mo lo lavilavi na tauni mo ngavulu sangavulu (*100*), ale hina purongo vara Sarah mo aroaro.

²⁰ Mo sopo řomkaka na retitauhi non God, pani mo ulua řilangi na nona rasua, ale mo lo sile na oloolo isan God, ²¹ mo levosahi mamahunia vara God i eři vai na sava mo retitauhi hinia. ²² Ale matan nona rasua atu, ‘God mo vereaa vara enia mo tataholo na nahona.’

²³ Pani reti sei akerihi, ‘God mo vereaa vara enia mo tataholo...’ la sopo ulia matan Abraham hasena, ²⁴ pani matan nořa rasua sohena. God i pa vereaa sohena isan la haratu la lo tau nora

rasua hin God sei mo sauteterahi Iesu noŕa Moli na mateia. ²⁵ Enia, God mo silea mata noŕa hehe, ale mo sauteterahia matan vara i vaiŕa řa tataholo na nahona.

5

Rasua Mo Sile Na Avulahi

¹ Ale matan nake řa tataholo moiso na nahon God na rasua, řa toho na tamata peresi God hin noŕa Moli Iesu Křisto. ² Hinia, řa eři unu na řomřuhu sei řa lo turu hinia mata rasua, ale řa lo avulahi tavera matan řa lo řomtoho vara řa pa toho peresi God na hasohasona. ³ Aulu hin haratu, řa avulahi na noŕa rani řilangi, matan řa lev-osahia vara noŕa rani řilangi, vuana enia posposi mata turu řilangi, ⁴ ale posposi mata turu řilangi, vuana enia jelu na hinau vaihite, ale posposi mata jelu na hinau vaihite, vuana enia řomtoho, ⁵ ale noŕa řomtoho sei i pa sopo eři vano řomřomi purongo matan Tanume Tapu sei God mo silea isaŕa mo surei na opoia non God na mapuŕa.

⁶ Matan na rani mo sopo lo te noŕa suiha, na ranina tataholo, Křisto mo mate mataŕa tamlohi sei řa lo usuri na posposi varama. ⁷ I pa řilangi vara o eři vilei tea vara i mate mata tamlohi tataholo matea, pani korong, tea i pa eři řomřilangi vara i mate matan te tamlohi řuhu hatea; ⁸ pani God mo vujangia vara nona opoia mataŕa mo sohena sava matan, hin rani atu řa pa lo tamlohi hehe, Křisto mo mate mataŕa. ⁹ Matan řa mai řa tataholo na nahon God mata řaen Iesu moiso, ale nake, mo sopo te retiusia hatea vara Iesu i eři juriŕa na talai lolokoru non God mata hehe. ¹⁰ Matan, vara God mo sari tamata peresiŕa na mateia non Natuna

na rani řa pa lo nona meresahi, nake matan řa turu na tamata peresia moiso, mo sopo te retusia hatea vara řa pa eři juri na maurina teni i vono. ¹¹ Aulu hin haratu, řa avulahi tavera hin God hin nořa Moli Iesu Křisto, ale hinia, nake řa lavi na nona sari tamata, řa mai řa tapalana.

Matea Mo Mai Matan Adam

¹² Ale matana, sohena hehe mo mai na varama na tamlohi matea purongo, ale mateia mo mai mata hehe, ale sohena, mateia mo tikeli na tamlohi tari matan enira mo isoiso la vai na hehe, ¹³ matan hehe mo lo toho na varama moiso God mo pa sile na leu, ale mo sopo te hehe vara i sopo te leu hatea i pisuhia. ¹⁴ Hina purongo matana, mateia mo lo aulu na tamlohi mo tapulo hin Adam mo tikeli Moses, hina purongo vara la sopo vai na hehe sohena hehe non Adam, mateia mo lo aulu hinira. Ale Adam enia tovongi matea hin harasei mo lo mai hitahu.

Mauri Tui Mo Mai Matan Iesu

¹⁵ Pani hehe non Adam mo sopo sohen řomřuhu sei God mo sile purongoia, matan hehe nona tamlohi matea purongo, mateia mo vano isana tamlohi matuvana, pani hin na tamlohi tinapua matea, Iesu Křisto, God mo sile purongoi na otori řuhu mata řomřuhu mo masurere isana tamlohi matuvana. ¹⁶ Ale otori řuhu sei God mo sile purongoia, mo sopo sohena vua hehe non tamlohi atu, matan vua aria matan hehe atu enia matea purongo, mo lavi na talai mo mai, pani otori řuhu sei God mo sile purongoia, mo mai hitahun na hehe matuvana, mo roi na malele vara God i eři vereea vara tamlohi la mai tataholo na nahona. ¹⁷ Varařuhu, mateia mo aulu na tamlohi

tari matan hehe atu matea non tamlohi atu matea purongo, pani la haratu la lo lavi řomřuhu sei mo mařivi savulevule peresi na otori sei God mo sile purongoia mata i vai na tamlohi la tataholo na nahona, enira natu, maurira la pa aulu na mauri nake ale hitahu hin tamlohi atu matea, enia Iesu Křisto.

¹⁸ Ale matana, sohena hehe nona tamlohi matea purongo mo vai na talai mo mai isana tamlohi tari, ale vavahinau tataholo matea purongo, mo vai na malele vara God i vereva vara tamlohi la tataholo na nahona, ale matan vara i eři sile na mauri isana tamlohi tari. ¹⁹ Ale sohena lejileji nona tamlohi matea purongo mo vai na tamlohi matuvana la hehe, ale mo sohena oloolo nona tamlohi matea purongo mo vai na tamlohi matuvana la tataholo na nahon God. ²⁰ Ale nakerihi natu, leu mo mai vara i vai na hehe i memera i řuhu, pani vara hehe mo mai mo mele tavera, řomřuhu natu, mo mai mo mele mařivi savulevule jea, ²¹ matan vara sohena mateia mo vujangi na suiha nona hehe, řomřuhu i pa eři vujangi na nona suiha hin malele sei God mo vai na tamlohi la tataholo na nahona hinia, ale vuana, enia mauri tui hin Iesu Křisto nořa Moli.

6

Suihan Hehe Mo Moti

¹ Ale nake řa pa vere na sava vara mo sohena? Mo tataholo vara řa lo vai na hehe i lo vano matan vara řomřuhu i pa lo mařivi savulevule matana, teni mo vono? ² Mo vono! I pa sohena sava natu vara enřa sei řa mate na hehe moiso, řa lo toho hinia? ³ Teni ka sopo levosahia vara enřa sei řa

lavi na paptijo hin Křisto Iesu, řa paptijo hin na nona mateia? ⁴ God mo tavuniřa peresi Iesu na nona mateia na rani řa paptijo hinia, matan vara enřa sohena, řa eři hahau na mauri paro sohen Křisto sei mo turu na mateia na mauri paro na suihan God Tama.

⁵ Matan, vara enřa řa sořotahi peresia na nořa mate sohen na nona mate, řa levosahia vara řa pa sořotahi peresia na sauteterahi sohen na nona sauteterahi. ⁶ Ra levosahia vara nořa mauri tuai mo mate peresia na talopeillopei matan vara i tope na suihan hehe na mauriřa, matan vara řa pa sopo mele slev isan hehe. ⁷ Matan haratu mo mate moiso, mo pete materi moiso na hehe. ⁸ Ale vara řa mate peresi Křisto, řa rasua vara řa pa mauri peresia. ⁹ Ra levosahia vara God mo sauteterahi Křisto na mateia moiso, ale i pa sopo eři mele mate; mate mo sopo te suihana vara i eři aulu hinia. ¹⁰ Matan mateia atu mo mate hinia, mo mate vara i jeu na hehe, vahatea mata rani tari, pani mauri atu mo mauri hinia nake, mo mauri matan God. ¹¹ Ale kamim sohena ha levosahia vara kamim sohena ka mate isan hehe, ale ka mauri matan God hin Křisto Iesu.

¹² Matan haratu, ha sopo tinařihia vara hehe i aulu na epemim nike na varama, vara i vai kamim ha oloolo na masalora. ¹³ Ha sopo tinařihia vara te epemim la mai volitusi na hehe mata posposi mo sopo tataholo na nahon God, pani ha sile kamim isan God sohen la haratu sei God mo vaira la malue na mateia la mauri, ale ha sile na epemim isan God sohena volitusi mata posposi tataholo na nahon God. ¹⁴ Matan hehe i sopo eři te suihana vara i aulu hin kamim, matan kamim ka sopo toho

na ruhuru leu, pani ka lo toho na ruhuru
řomřuhu.

Ra Eři Oloolo Hin God

¹⁵ I pa sohena sava natu? Matan řomřuhu non God mo vaiřa řa materi moiso, mo tataholo vara řa hahau na hehe matan nake řa sopo toho na ruhuru leu teni mo vono? Mo vono! ¹⁶ Ka levosahia vara, vara ka sile kamim isan tea sohena slev matea, ha pa oloolo hinia ale ka slev isan haratu sei ka lo oloolo hinia. Vara ka slev na hehe, vuana enia mateia, vara ka slev mata oloolo hin God, vuana enia posposi tataholo na nahona.

¹⁷ Pani řa vere meje isan God matamim sei tuai ka lo slev non hehe, pani nake ka mai ka oloolo na mapumim na vujangi tataholo sei la silea isamim moiso, ¹⁸ ale nake, ka materi na hehe, ale ka mai slev non posposi atu mo tataholo na nahon God.

¹⁹ Na lo vere na tovongi na slev sohena matan vara i tueni na nomim lelevosahi. Matan sohen tiroma ka lo sile na epemim sohena slev mata hina lumiha teni vaivaileu sei vuana mo mele vaivaileu jea, ale nake ha sile na epemim sohena slev isan posposi sei mo tataholo na nahon God sei vuana mo lo vai kamim vara ha tapu na maurimim.

²⁰ Na rani ka pa lo slev non hehe, ka sopo řomřomi na posposi sei mo tataholo na nahon God. ²¹ Pani vuana enia sava? Vuana mo sopo řuhu matan nake ka lo mahanuhanu matan la hinau sei ka lo vaira tiroma, matan isoison la hinau sei, enia mate. ²² Pani matan nake ka materi moiso na hehe, ale ka mai slev non God, vua ka lavia matana mo vai kamim vara ha pa tapu na maurimim, ale isoisona, enia mauri tui. ²³ Matan voli hehe enia mateia, pani otori non God sei mo lo

sile purongoia, enia mauri tui hin Křisto Iesu nořa Moli.

7

Leu Mo Sopo Mele Aulu Hiniřa

¹ Teni, ka levosahia la vorai peresi na vevorai vara, vara leu mo lo suiha purongo vara tamlohi mo lo mauri? Na lo retireti isan la haratu la levosahi na leu. ² Mo sohena hařai lahi matea, leu mo lo tauria vara tuana mo lo mauri, pani vara tuana mo mate, hařai atu mo materi na leu mata lahi. ³ Ale vara tuana mo lo mauri, pani mo mele juruvi peresi na tamlohi tinapua, la pa vereaa vara enia hařai vaivaileu matea. Pani vara tuana mo mate, hařai atu i pa materi na leu, vara i vano isana tamlohi tinapua matea, enia mo sopo hařai vaivaileu.

⁴ Mo sohena natu, la voraiku peresi na vevoraiku, kamim sohena, ka mate na leu peresi Křisto matan vara ha pa mai tamlohi non tinapua, haratu non Křisto sei God mo sauteterahia na mateia matan vara řa eři vua řuhu isan God. ⁵ Matan tiroma řa lo usuri na masalořa sei mo lo vua hehe, ale vuana enia mateia. ⁶ Pani nake řa materi na leu, matan řa mate peresi Křisto moiso, ale řa sopo mele toho na ruhuruhi suiha leu, matan vara řa eři volitusi isan God, mo sopo na malele mata oloolo na retileu la ulia tuai, pani na malele paro, hin mauri atu Tanumena mo lo silea.

Leu Non God Mo Vujangi Na Hehe

⁷ Ra pa vereaa sohena sava natu? Ra pa vereaa vara leu enia hehe teni mo vono? Mo vono! Pani vara leu i sopo lo mai a pa sopo eři levosahi na

hehe. A pa sopo eři levosahia vara řomusuri enia sava, vara leu mo sopo vereia vara, ‘O sopo řomusuri’. *Exo 20.17; Deut 5.21*

⁸ Pani hehe mo lavi na masapa hin retileu atu, mo vaiiau na vua na řomusuri tinatinapua matuvana. Vara leu i sopo lo toho, hehe i pa sopo mauri. ⁹ Tiroma na lo toho hin mauri atu na sopo levosahi na leu hinia, pani na rani leu mo pala mo pisuhi na hehe ale mo mera purongo vara hehe mo lo mauri hiniau, ¹⁰ ale mo tauau na ruhuruu talai mata mate. Matan na vileia vara retileu atu sei mo lo retitauhi na mauri mo sopo silea, pani mo sile na mateia isaku. ¹¹ Matan hehe mo lavi na masapa matea na retileu, hehe mo halhaluau, ale retileu atu mo viliau, ¹² hina purongo vara řa levosahia vara leu tari la tapu, ale retileu enia mo tapu mo tataholo ale mo řuhu.

¹³ Ale ka hitea vara mo tataholo vara leu sei mo řuhu mo sile na mateia isaku? Mo vono! Hehe mo tauau na malele mata mate usuri na sava retileu sei mo řuhu mo vujangiau, matan vara hehe i pa pala hehe varařuhu, ale hin retileu sei, hehe mo pala mo sasati jea.

Suiha Hehe Na Mauriřa

¹⁴ Matan řa levosahia vara leu enia mata i vujangi mauri atu God mo opoia, pani enau na lo toho hin mauri atu nona tamlohi sei mo lo toho na ruhuruu suihin hehe. ¹⁵ Na sopo levosahia mata sava na lo vai na hinau na lo vaia. Matan na sopo vai na sava na opoia, pani na lo vai pa hinau sei na lo řohu vara a vaia. ¹⁶ Na levosahi mamahunia vara sava hinau na lo vaia mo sopo tataholo, enia mo vujangia vara na lo majinga vara leu enia mo

řuhu. ¹⁷ Pani nake, mo sopo enau sei na lo vaia, pani hehe sei mo lo toho isaku.

¹⁸ Matan na levosahia vara mo sopo te hinau řuhu na loloku, na lo vere na masalo varama na loloku. Matan na opoia vara a vai na hinau mo tataholo, pani na sopo eři vaia. ¹⁹ Matan na sopo vai na sava hinau řuhu na opoia, pani tarea na lo vai na hina sasati sei na sopo opoia. ²⁰ Ale, pani vara enau na lo vai na hinau na sopo opoia, enia mo sopo enau sei na lo vaia, pani hehe na loloku.

²¹ Ale na mauri na hitea vara na opoia vara a vai na hina tataholo, sasati mo lo kilau řořoiau.

²² Matan na loloku, enau na avulahi mo tavera jea na leu non God, ²³ pani na hite na leu tinapua matea mo lo voko na epeku, mo lo valum peresi na leu mata řomiku, mo opoia vara a lo toho na ruhuruhi suiha leu mata hehe na epeku.

²⁴ Enau tamlohi sasati matea! Hare i pa eři juriau na epeku sei mo tauau na ruhuruhun talai matan mateia nika? ²⁵ Pani řa vere meje isan God hin Iesu Křisto nořa Moli matan malele mo roi! Ale nake, enau na lo volitusi isan leu non God na řomiku, pani na loloku, na lo volitusi isana leu mata hehe.

8

Mauri Atu Tanumen God Mo Lo Silea

¹ Ale matan sava God mo vaia hin Křisto Iesu, nake natu, mo sopo te talai non la haratu sei la lo toho hin Křisto Iesu. ² Matan suiha non Tanume mata mauri hin Křisto Iesu mo teriho na suiha mata hehe peresi na mateia. ³ Matan leu mo sopo te suihana vara i eři posi na masalo varama na loloku, pani God mo vaia hin Natuna sei mo řulea

mo mai vara i tamlohi, matan vara i mai sohena malamalai mata hehe, pani mo sopo te hehe hinia, ale hinia, God mo komo na suihan hehe sei mo lo aulu hiniŕa, ⁴ matan vara sava hinau tataholo sei leu mo lo vereā la pa toho na mauriŕa sei ŕa sopo mele hahau usuri na masalo varama, pani ŕa lo hahau usuri na Tanume Tapu.

⁵ Matan la haratu la lo usuri na masalo varama, la lo tau na ŕomira na hinau mata masalon mauri atu, pani la haratu la lo usuri na Tanume Tapu na maurira, la lo tau na ŕomira na hinau non Tanume Tapu. ⁶ Matan vua ŕomŕomi mata masalo varama, enia mateia, pani vua ŕomŕomi mata Tanume Tapu enia mata mauri peresi na tamata. ⁷ Matan ŕomŕomi atu mo lo usuri na masalo varama, enia meresahi isan God, matan enia mo sopo oloolo na leu non God, matan i pa sopo eŕi oloolo hinia. ⁸ La haratu la lo usuri na masalo varama, la pa sopo eŕi vai na sava God mo avulahi hinia.

⁹ Pani kamim sei, ka sopo toho na ruhuruhi suihan masalo varama, matan ka lo toho na ruhuruhi suihan Tanume Tapu, varaŕuhu vara Tanumen God mo lo toho isamim. Vara tea mo sopo lavi na Tanumen Kŕisto, enia mo sopo nona. ¹⁰ Pani vara Kŕisto mo lo toho hin kamim, hina purongo vara epemim la pa mate mata hehe, Tanumena mo sile kamim na mauri matan mo vai kamim ka tataholo na nahona. ¹¹ Vara Tanumen haratu sei mo lo sauteterahi Iesu na mateia mo lo toho hin kamim, haratu mo sauteterahi Kŕisto Iesu na mateia i pa sile na mauri na epemim na Tanumena sei mo lo toho hin kamim.

¹² Matan haratu, la vorai peresi na vevorai enŕa tamlohi ave, pani mo sopo isana masalo varama,

ŗa sopo usuri na masalon mauri atu. ¹³ Matan, vara ha lo usuri na masalo varama, ha pa mate, pani vara hin Tanume Tapu ka lo tau naŗihi na vavahinau sasati nona epemim, ha pa mauri.

¹⁴ Matan tamlohi tari sei Tanume Tapu mo lo tiroma hinira, enira natun God.

¹⁵ Matan ka sopo lavi na Tanumena vara ha lo sohena slev sei la lo juhajuha mata matahu, pani ka lavi na Tanumena vara i korohi kamim sohena natuna, ale hinia, ŗa lo ulo vara, ‘Tata, Tamaku!’

¹⁶ Tanume Tapu hasena mo lo vujangi mamahuni na mapuŗa hinia mara enŗa ŗa natun God, ¹⁷ ale vara enŗa ŗa natuna, enŗa ŗa pa lavi na hinau God mo silea isan Natuna Kŗisto, vara ŗa lavi na rani řilangi peresia matan vara ŗa pa eŗi lavi na hija aulu peresia.

Mauri Pongi Hitahu

¹⁸ Matan enau na levosahia vara rani řilangi mata mauri nake, enira hina purongo na hina hasohaso řuhuŗuhu sei God i pa vujangia isaŗa.

¹⁹ Matan hinau tari God mo vaira la lo sasaovi vara la hite rani atu natun God la pa pala hinia.

²⁰ Matan God mo tau na lesati isana hinau tari na varama tuai tuai jea, mo sopo matan la opoia vara la sohena, pani matan God mo taura sohena, ale la lo kilau matan rani atu, ²¹ hinau tari na varama peresi na natun God la pa lavi materi sei mo řuhuŗuhu jea. La pa malue hin mauri atu mata mate peresi na mauri mata řovo. ²² Matan ŗa levosahia vara hinau tari God mo vaira, la lo ngutu na rongohaji mata vasusu mo tikeli nake. ²³ Ale mo sopo hinau God mo vaira purongo, pani enŗa sohena sei ŗa lavi na tiroma asitauni isan Tanume

Tapu, řa lo ngutu na lolořa, řa lo saovi matan rani atu sei řa pa mai sohena natuna tataholo, ale řa lavi na epeřa paro. ²⁴ Matan hin řomtoho sei, God mo juriřa. Vara řa lo hite na sava řa lo řomtoho hinia, mo sopo řomtoho varařuhu natu. Matan hare mo lo řomtoho na hinau mo eři hitea? ²⁵ Pani vara řa lo řomtoho na hinau řa sopo hitea, řa pa lo kilau matana na nořa řomperavu.

²⁶ Mo sohena natu, Tanume Tapu mo lo tueniřa na nořa vejuveju, matan řa sopo levosahia vara řa pa usiusi mata sava hinau sohen God mo opoia, pani Tanume Tapu hasena mo lo usiusi nořa na malele matea mo sopo te reti vara i eři vere na řaramina. ²⁷ Pani haratu sei mo levosahi na mapu tari, mo levosahi na sava mo lo toho na řomin Tanume Tapu, matan Tanume Tapu mo lo usiusi nona tapuhi usuri na masalon God. ²⁸ Ale řa levosahia vara la haratu la opoi God, hinau tari la voko jara matea mata řuhu non la haratu God mo tovira usuri na nona řomřomi tavera. ²⁹ Matan la haratu mo viřonira tiroma, mo pete tapuhira moiso vara la pa mai sohen Natuna, matan vara enia i pa vora tiroma na vorai matuvana. ³⁰ Ale la haratu mo pete tapuhira moiso, mo tovira, ale la haratu mo tovira, mo vaira la tataholo na nahona, ale la haratu mo vaira la tataholo na nahona, mo tahera aulu na hasohasona.

Opoia Non God

³¹ Ra pa vereah sohena sava natu? Vara God enia nořa, hare i pa eři komořa? ³² Vara God mo sopo horo Natuna tataholo, pani mo silea matařa enřa mo isoiso, sohena sava natu, God sei mo sile Křisto isařa i pa sopo eři sile na hinau tari isařa?

³³ Hare i eři pisuhi na viřoni non God matan te hinau? God natu, mo vaira la tataholo na nahona.

³⁴ Hare natu i pa vereā vara i pa eři sile na talai isařa? * Křisto Iesu enia haratu mo mate, aulu hin haratu, enia mo turu na mateia, ale mo lo toho na suiha na matuan God, ale enia natu mo lo usiusi nořa. ³⁵ Hare i pa aseřa na opoia non Křisto? Rani řilangi, teni rani sasati, teni tipahi, teni mařua, teni malamala, teni hinau mo eři komo na mauri, teni vuro? ³⁶ Varařuhu la uli la hinau sei moiso na Retiulia vara, ‘Matam, mateia mo lo toho na nahomam tarea, ale la hite kamam sohen natu sipsip sei la pa vilimateira’. *Psa 44.22*

³⁷ Mo vono, hina purongo hin la hinau tari sei matan řa eři jeura hin Křisto sei mo opoiřa.

³⁸ Matan na levosahi mamahunia vara řa mate teni řa lo mauri, teni angelo, teni tamlohi aulu, teni hinau nake la lo toho, teni hinau la pa mai, teni haratu la řilangi, ³⁹ teni te hinau aulu na mas-apa teni na puaha atano na lolo tasi teni varama, teni te hinau tinapua na varama, i pa sopo eři aseřa na opoia non God hin Křisto Iesu nořa Moli.

9

Tapuhi Non God Hin Israel

¹ Na lo vere na retivarařuhu na hijan Křisto, na sopo halu; řomiku mo levosahia vara Tanume Tapu mo levosahia ² vara řomiku mo jovi tavera, ale mapuku mo tangi, ³ vara te malele vara vo-raiku sei tahisaku Israel, la eři juri hinia, a pa hase tai nařihiau hin Křisto, a mai hina lesati mata

* **8:34:** sile na talai: tamlohi teni Tiapolo la pa vaihitea pani God mo sile na talai isan Křisto matařa.

malelera. ⁴ Enira la tavgavuvin Israel, ale enira korohi non God, mo vujangi na nona matamata tavera isara la řuhuřuhu jea, peresi na nona retitauhi isara tuai, la lavi na nona leu, la lavi na posposi mata lotua, ale nona retitauhi mata jurira.

⁵ Ale pira tuai enira tamlohi aulu non God, ale Křisto vara řa usuri na malele tamlohi, enia mo tai isara, enia God sei mo aulu na hinau tari, ale i pa lavi na hasohaso tarea tui tui, amen.

⁶ Pani mo sopo sohena vara God mo řomaliho na nona retitauhi isan tavgavuvin Israel, matan mo sopo tamlohi tari sei la tai isan Israel la tavgavuvin Israel, ⁷ ale mo sopo vara enira mo isoiso natun Abraham vara enira taniana, pani matan la ulia vara, ‘Tanium la pa lavi na hijam hin Isaac’. *Gen 21.12*

⁸ Enia mo řaramia vara na nahon God mo sopo taniana tari la tai isan Abraham la natun God, pani natuna tari na nona retitauhi, enira mahapin Abraham. ⁹ Matan retitauhi mo vereea sohen harahi mara, ‘Sohen harakerihi tavul tauni a pa mele mai, ale Sarah i pa vasusui na lamane matea’. *Gen 18.10, 14*

¹⁰ Mo sopo haratu purongo, pani Rebecca sohena mara mo vasusui na havo isan tamlohi matea purongo pira Isaac, ¹¹ pani tiroma la pa vora, teni tiroma la pa vai te hinau mo řuhu teni mo sati, matan vara řomřomi non God mata viřoni na nona tamlohi i pa turu, ¹² mo sopo mata nora vavahinau, pani matan God mo tovia, mo vereea isan Rebecca mara, ‘Vora tiroma i pa volitusi isan vora hitahu’. *Gen 25.23*

¹³ Sohen la ulia vara God mo vereea mara, ‘Na opoi Jacob, pani na řohu hin Esau’. *Mal 1.2–3*

14 Vara sohena, řa pa vere na sava? God mo tametame tea teni mo vono? Mo vono! 15 Matan God mo vere a isan Moses mara,

‘A pa řomřuhu hin haratu sei na řomřuhu hinia,

a pa řomopoi hin haratu sei na řomopoia.’

Exo 33.19

16 Matan haratu, mo sopo turu na masalon te tamlohi teni te nona vavahinau, pani mo turu hin God sei mo lo řomopoi.

17 Matan na Retitapu God mo vere a isan Pharaoh mara, ‘Na taheho sahe aulu matan hinau akerihi natu, vara a pa eři vuhesi na suihaku hiniho, ale matan vara tamlohi la pa hasohaso na hijaku na jara tari na varama’. *Exo 9.16*

18 Ale matan haratu mo vujangia vara God mo lo řomopoi na sava tamlohi enia mo opoia, ale enia mo lo pelati na mapun hare enia mo opoia.

19 Korong tea i pa vere a isaku vara, “Avei, vara God mo vai na masalona sohena, mata sava natu mo pa lo hite na hehe? Matan hare natu, i pa eři horo na masalona?”

20 Pani engko sava tamlohi natu, vara o pa eři reti isan God sohena? ‘Mo tataholo vara hinau sei God mo vaia, i eři vere a isan God sei mo vaia vara, “Mata sava ko vai au sohen harihi?”’ *Isa 29.16; 45.9*

21 Teni vara tamlohi sei mo lo vai na jilivi na lepa, ko hitea vara mo sopo tataholo vara i vai na jilivi i rua na vořoli lepa matea vara matea mata jara lakolako, ale matea mata jara utauta?

22 Ko hitea mo tataholo vara God mo opoia vara i lo řomperavu tako hin la haratu mo viřonira mata komo moiso, matan vara i eři vujangi na nona talai lolokoru mata hehe peresi na suihana

isana tamlohi, ²³ matan vara i efi vujangia vara
 řuhuřuhuna mo řuhuřuhu jea sohena sava isan la
 haratu sei i pa řomopaira, enira sei mo viřonira
 moiso mata lavi na řuhuřuhuna, ²⁴ enřa sohena,
 enia mo toviřa, pani mo sopo toviřa isana Jew
 purongo, pani isana tamlohi řořoha sohena.

²⁵ Sohen God mo vereea na Retiulia non Hosea
 mara,

‘La haratu sei la sopo noku tamlohi,
 nake a pa toviřa “noku tamlohi”
 ale a pa opoi hařai sei
 mo sopo tea i opoia.’

Hos 2.23

²⁶ Ale,

‘Tiroma mo vereea isara mara,
 “Ka sopo noku tamlohi”,

pani nake i pa vereea vara,

“Kamim ka natun God sei mo mauri”.’ *Hos*

1.10

²⁷ Ale Isaiah mo lo ulo aulu matan Israel mara,
 ‘Hina purongo vara evi natun Israel
 la sohena oneone vavarihi na tasi,
 tupu visalete purongo la pa juri.

²⁸ Matan Moli i pa sile vevuhi

na nona talai i vila, řomina i pa sopo rua
 hinia.’ *Isa 10.22–23*

²⁹ Ale sohen Isaiah mo vereea tiroma moiso
 mara,

‘Vara Moli Suiha Tavera Jea na tuka

i sopo lo tinařihia vara te mahapimam la
 mauri,

korong kama pa tihai sohen Sodom peresi
 Gomorrah moiso.’

Isa 1.9

Israel La Sopo Rasu God

³⁰ Ra pa vereia sohena sava natu? Ra pa eʻi vereia vara haratu la tamlohi ʻroʻroha la mai la tataholo na nahon God pani mo sopo matan la lo tutunguia pani matan la rasu God, ³¹ pani Israel sei la lo tutungui na leu vara i pa vaira la tataholo na nahon God, pani la sopo eʻi vai vevuhi leu atu. ³² La sopo eʻi vaia mata sava? Matan la sopo tutunguia na malele rasua, pani la hitea vara la pa vaia na nora vavahinau. La tialahalaha hin vatu atu mata tialahalaha, ³³ sohena la ulia vara, ‘Ka hitea? Na lo tau na vatu matea hin Zion mata tialahalaha,* ale na tau na vatu matea matan i pa vaira la jovi, pani haratu mo tau na nona rasua hinia, i pa sopo tea i eʻi vaia i mahanuhanu.’ *Isa 8.14; 28.16*

10

God Mo Juri Na Tamlohi Mata Rasua

¹ La voraiuku peresi na vevoraiku, noku usi isan God peresi na opoia na mapuku mata tavitavuiuku Israel, enia vara la pa juri. ² Na lo vereulia matara, vara la lo ʻromjea hin God, pani la sopo usuria na malele mata lelevosahi. ³ Matan, la sopo rongovosahi na malele sei God mo taua vara tamlohi la pa mai la tataholo na nahona hinia, ale la lo ale na malelera purongo sei vara la pa tataholo na nahon God hinia, la ʻrohu vara la usuri malele atu God mo lo vai na tamlohi la mai la tataholo na nahona hinia. ⁴ Matan hin Kristo

* **9:33:** Zion: Zion enia Jerusalem.

mo vai vevuhi na leu, matan hinia, tamlohi tari sei la rasua la mai la tataholo na nahon God.

Israel La Jalio Na Malele

⁵ Matan Moses mo ulia mara te tamlohi mo opoia vara i mai i tataholo na nahona na malele mata leu, enia i pa usuri vevuhi na nona retileu na maurina. *Lev 18.5*

⁶ Pani vujangi atu mo vujangia vara tamlohi la mai la tataholo na nahon God na rasua mo vereaa mara, ‘O sopo vereaa na mapum vara, “Hare natu i pa sahe na tuka?” ’ *Deut 30.12* vara i tapai Křisto, ale i lavia i sinai vara i vujangiho. ⁷ Ale vujangi atu mo vereaa mara, ‘Hare natu i pa sivo hin koko tavera jea atu sei mo sivo atano jea na lolo varama mata mateia?’ *Deut 30.13* vara i lavi Křisto i mele mauri na mate. ⁸ Malele mata juri mo mai mata rasua hin Křisto, enia natu, Retiřuhu sei kama lo retivujavujangia, mo mariviti isam purongo, pani mo lo vere na sava? ‘Retisohai sei mo mariviti, mo lo toho na huřurivim, ale mo lo toho na mapum’.

Deut 30.14

⁹ Matan, vara o taviti na jingom vara Iesu enia Moli, ale o rasua na mapum vara God mo sauteterahia na mateia, o pa juri. ¹⁰ Matan rasua na mapum purongo, enia natu, mo vaiho ko tataholo na nahon God, ale ko pa juri matan ko taviti na jingom. ¹¹ Matan Retitapu mo vereaa mara, ‘Tamlohi tari sei la tau na nora rasua hinia, i pa sopo tea i vaira la mahanuhanu’.

Isa 28.16

¹² Ale nake God mo sopo mele vereaa vara Jew teni mara Greek matan enia Moli matelete nora Moli enira mo isoiso, enia mo sile na nona řuhuřuhuna isana tamlohi tari sei la lo kilau isana. ¹³ Matan

Retiulia mo vara, ‘Tamlohi tari sei la tovi na hijan Moli God la pa juri’. *Joel 2.32*

¹⁴ Sohena sava natu, la haratu la sopo lo rasua la pa eři tovia? Ale sohena sava natu, la pa tau na nora rasua hinia matan la sopo lo levosahia? Ale la pa rongoa sohena sava vara tea i sopo retivujavujangi isara? ¹⁵ Ale sohena sava natu la pa retivujavujangi isara vara tea mo sopo řulera? Mo sohen la ulia vara, ‘Rani řuhu mata avulahi matan la haratu la lo retivujavujangi na Retiřuhu la pala!’

Isa 52.7; Nah 1.15

¹⁶ Pani mo sopo tamlohi tari la rasu na Retiřuhu, sohen Isaiah mo vereea mara, ‘Moli, hare mo rasu na sava mo rongoa isamam?’

Isa 53.1

¹⁷ Ale haratu mo vujangia vara rasua mo vora na sava la rongoa, ale sava la rongoa mo mai na retivujavujangi na reti non Křisto.

¹⁸ Pani na lo usia vara korong, Jew la sopo lo rongoa? Mo vono, la rongoa, matan Retiulia mo vereea vara,

‘Leora mo vano na jara tari na varama,
nora reti la vano na jara mo isoiso na varama.’

Psa 19.4

¹⁹ Pani na mele usia vara, korong Israel mo sopo levosahia? Matan na rani non Moses, God mo vereea mara,

‘A pa vai kamim ha mereimerei
na mara jara tinatinapua,
a pa vai kamim ha lolokoru
na tamlohi řořoha mara jara tinatinapua.’

Deut 32.21

20 Ale hitahu Isaiah mo řomřilangi vara i vereaa vara,

‘La haratu la sopo aleau la hiteau.

Na hase vuhesiau isan la haratu
la sopo usia isaku.’

Isa 65.1

21 Pani isan Israel God mo vereaa mara,

‘Tarea na roi na limaku matara,
pani tarea la sopo oloolo hiniau,
ale la lo lejiau.’

Isa 65.2

11

God Mo Tipahi Israel Teni?

1 Ale na lo usia nara, korong God mo tipahi na nona tamlohi teni mo vono? Mo vono! Matan enau sohena matea na vora Israel, mahapin Abraham, tavgavuina Benjamin.

2 Mo vono, God mo sopo tipahi na nona tamlohi sei mo levosahira tiroma moiso. Ka lo řomřomi na sava Retitapu mo vereaa matan Elijah sohena sava mo usia řilangi isan God mata posposi nona tavgavuina Israel sei mara, 3 Moli, la vilimatei na nom přovet, la viliroiroi na nom votavota, enau haseku na pa lo toho, ale la lo aleau vara la vilimateiau’.

1 Kings 19.10, 14

4 Pani God hasena mo řaramia isana sohena sava? Enia mara, ‘Enau na tapuhi nařihi na tamlohi mo tari vaha limaravrua (7000) moiso sei la sopo popovitoho isan Baal’.

1 Kings 19.18

5 Mo sohena nake, tupu visalete purongo God mo viřonira na nona řomřuhu. 6 Ale vara mo usuri na nona řomřuhu, mo sopo matan te vavahinau, vara i vono, řomřuhu atu i pa sopo řomřuhu.

⁷ I pa sohena sava natu? Israel la jovi na sava la lo alea, la alea vara la mai la tataholo na nahon God. Tatuara God sei mo tapuhira la lavia, pani mo pelati na řomin la haratu mo sopo tapuhira,
⁸ mo usuri na sava la ulia vara,
'God mo vai na řomira la mate mo tikeli nake,
mo pelati na matara,
ale la sopo hitevosahi,
mo pelati na perora,
ale la sopo rongovosahi.'

Deut 29.4; Isa 29.10

⁹ Ale David mo vereaa mara,
'God o vai na hinau la opoira
sohena vuna teni tara matea,
la sohena hinau mata tialahalaha isara,
hinau mata sile na talai isara.
¹⁰ O vai na matara la řořoha
matan vara la sopo hitevosahi,
ale o vai na hařira
la hoho na hina puhoni la lo lavira.'

Psa 69.22-23

Matan Israel Romřuhu Non God Mo Mai

¹¹ Na lo usia vara korong, enira la tialahalaha matan vara la pa jovi vevuhi? Mo vono! Pani matan na nora jovi, God mo juri na tamlohi řořoha, mo vaia matan vara i vai Israel i mereimerei. ¹² Ale vara vua nora hehe matan la tipahi nora Jujuri mo vai na nona tavgav mo mai isana tamlohi tari, ale vara vua nora jovi enia tavgav nona tamlohi řořoha, řa sopo levosahia vara i pa mele řuhu jea sohena sava hin rani atu vara la mele pulutahi vevuhi isan God!

¹³ Na lo vere la hinau tari nike matamim ka tamlohi řořoha, God mo viřoniau vara a vahařule

isana tamlohi řořoha, na tahe na noku vavahinau isamim na nahora, ¹⁴ vara a hite te malele hatea vara a vai na Jew la opoi na sava kamim ka tamlohi řořoha ka lo lavia, ale hin malele atu a pa eři juri te tatuara. ¹⁵ Matan, vara vua nora tipahi enia God mo sari tamata mata tamlohi tari, i pa mele řuhu jea na varama sohena sava vara la mele hilu, korong i pa sohen la haratu la mele turu na mateia. ¹⁶ Vara sope silesilea atu mata flaua sei la lo silea isan God tiroma mo tapu, sope flaua tari la pa tapu, ale vara wari vipahai atu la pa tapu, rangarangana sohena la tapu.

Israel Enia Pulo Olive Atu God Mo Lavoa

¹⁷ Pani vara God mo tai nařihi na tatua rangarangan pulo olive atu, ale God mo sořotahi kamim olive urata, ka vano na livuhara, ale ka ulua na hanhani řuhu na pulon olive atu, ¹⁸ ha sopo hapahapa mata rangarangana. Pani vara ha hapahapa, ha lo řomřomia vara kamim ka sopo tueni na warina, pani warina mo lo tueni kamim.

¹⁹ Ale vara ka lo vereva vara, ‘La rangaranga atu God mo tai nařihira vara i vai na masapa matakú.’

²⁰ Vararuhu, mo vaia, pani ha lo řomřomia, la rangarangana atu enira Jew, God mo tai nařihira matan la sopo rasua, ale kamim ka lo toho atu matan ka rasua. Ha sopo řomaulu hin kamim, pani ha matahuni na sava i eři masese isamim.

²¹ Vara God i sopo řomi na rangarangana tataholo matan la tipahi nora Jujuri, i pa sopo řomi kamim.

²² Ha hitevosahia, vara posin God mo sohena sava, mo řomřuhu ale mo řilangi jea. Mo řilangi jea isan la haratu la tipahi na nora Jujuri, pani mo řomřuhu isamim, ale i pa řomřuhu isamim vara

ka lo tau na nomim rasu hinia, pani vara ka sopo mele tau na nomim rasua hinia, kamim sohena i pa tai naʻihi kamim. ²³ Ale vara Jew la posi mai la tau na nora rasua hinia, God i pa mele soʻotahira vano na pulon olive atu, matan God i eʻi mele soʻotahira.

²⁴ Matan, vara mo avulahi vara i lavi kamim olive urata purongo, ale i soʻotahi kamim ha vano na pulo pulana olive ʻruhu, enia hina maʻurahi matea, i pa mele malum isan God vara i mele tau na rangarangana tataholo i mele soʻotahia na jarana tataholo na pulon olive atu.

Jujuri I Pa Tai Jerusalem

²⁵ Matana, la voraiku peresi na vevoraiku, na opoia vara ha levosahi hina luhu nike matan vara ha sopo ʻromaulu, God mo vai na mapun tatua tavgavu in Israel la ʻrilingi i pa tikeli rani atu evi tamlohi ʻroʻroha la unu vevuhi. ²⁶ Ale vaon Israel tari la pa juri hin malele atu, sohen la ulia moiso vara,

‘Tamlohi Jujuri matea i pa tai Zion,*
ale i pa posi na tavgavu in Israel
na nona posposi varama.

²⁷ Ale harihi enia noku retitauhi peresira, hin rani atu na lavi naʻihi na nora hehe.’ *Isa 59.20–21*

²⁸ Jew matuvana nake la meresahi na Retiʻruhu matamim, pani enira la pa lo toho viʻroni non God mata nona retitauhi isan Abraham, Isaac peresi Jacob. ²⁹ Matan silesilea peresi na tovi non God la sopo eʻi jovi. ³⁰ Sohen tuai ka sopo oloolo hin God, pani nake ka lavi na nona ʻromopoia matan

* **11:26:** Zion: Zion enia Jerusalem.

la sopo oloolo, ³¹ enira nake sohena, la sopo oloolo matan vara God i pa řomopoi kamim, pani enira sohena, la pa eři lavi na nona řomopoia. ³² Matan mo sohen God mo pelatihoro na tamlohi tari na nora hehe matan la sopo oloolo, matan vara nona řomopoia i eři toho isara isoiso.

Paul Mo Hasohaso God

³³ Hare natu i eři vereva vara nona lelevosahi peresi na sava mo levosahia la řuhuřuhu sohena sava! Mo sopo tea i eři levosahi na sava mo hatihia moiso, ale mo sopo tea i eři hitevosahia vara sava mo lo vaira mo vaira sohena sava.

³⁴ Matan hare i eři levosahia vara God mo lo řomřomi na sava? Hare mo tataholo vara i eři pisuhi na malele isana? *Isa 40.13*

³⁵ Teni hare natu, mo sile te hina silesilea isana matan vara i pa mele spaia? *Job 41.11*

³⁶ Matan God enia pulo hinau tari matan enia mo vaira, mo vaira la lo toho vara la pa sile na hasohaso isana. Mo tataholo vara tamlohi tari la sile na oloolo isana tarea mata rani tui tui. Amen.

12

Mauri Paro Peresi Křisto

¹ Matan la hinau sei God mo vaira moiso la vorai peresi na vevorai, na lo usia řilangi vara ha sile na epemim isan God sohena hina malamalai matea mo mauri mo tapu isana, haratu God i pa avulahi hinia. Harihi enia nomim lotu tataholo vara ha lo vaia isana. ² Ha sopo hahau usuri na posposi non varama nike, pani ha tinařihia vara God i posi kamim matan vara ha eři levosahi na malele paro mata řomřomi, ale hin malele sei ha pa eři levosahia vara masalon God mo opoia vara ha pa

vai na sava mo řuhu, ale mo tataholo, ale sava natu, mo vaia mo avulahi.

³ Matan usuri na řomřuhu sei God mo silea isaku na lo vereva vara ha sopo hase řomaulu hin kamim i jeu na sava mo tataholo vara ha řomřomia, pani ha hase řomvosahi kamim i usuri na silesilea mata rasu atu God mo lo silea isamim.

⁴ Sohen epeřa sopesopena mo mařivi, ale nora vavahinau la tinatinapua, ⁵ ale mo sohena na epen Křisto. Enřa mo isoiso řa sopesope epena, pani epena enia matelete, ale enřa hatehateahi nořa vavahinau la tinatinapua vara řa vaia. Ale matan enřa mo isoiso řa matea na epe hin Křisto, enřa řa nořa hatehateahi.

⁶ Romřuhu non God mo silea isařa mo vaiřa řa eři vai na hinau hai, ale vara nom enia mata o retimangovi, o vereuli na sava ko rasua vara God mo lo vereva isam, ⁷ vara nom enia mata o tueni na tinapua, o tueni mamahunira, vara nom enia mata o vujangi, o vujangi i řuhu, ⁸ vara nom enia mata o retituetueni, o vaia, vara nom enia mata o silesile, o silea na avulahi, vara nom enia mata o tiroma na tamlohi, o vai mamahunia, vara nom enia mata o řomopoi hin te tinapua, o vaia na avulahi.

Posposi Tataholo Nona Mauri Kalesia

⁹ O sopo halu na nom opoia mata tinapua, pani o opoira varařuhu, ha řohu na sava mo hina sasati, ha turu na hinau mo řuhu. ¹⁰ Ha opoiopoi kamim na opoia varařuhu, ha lo kilau mata masapa vara ha sile na ololo isana tinapua tiroma. ¹¹ Ha sopo malokovari, pani ha vařileřile na vavahinau non Moli.

¹² Ha avulahi matan hinau sei ka lo řomtoho hinia vara God i pa vaia isamim, ha řomperavu na rani řilangi, ha lo usiusi tarea. ¹³ Vara te tapuhi non God mo vejuveju hin te hinau, ha tuenira na nomim hinahinau, ale ha avulahi vara ha lavi na tamlohi na imamim.

¹⁴ Ha usi God vara i vaia i řuhu isan la haratu la lo tipahi kamim, ha leřuhu hinira, ha sopo lesati hinira. ¹⁵ Ha avulahi peresi la haratu la avulahi, ha tangi peresi la haratu la rongo mo sati.

¹⁶ Ha řomřomi na tinapua i tataholo hin kamim, ha sopo haruharu matan vara tamlohi aulu la pa tametame kamim, pani ha avulahi vara ha lo toho peresi na tamlohi purongo, ale ha sopo řomaulu hin te rani.

¹⁷ Ha sopo kelekele. Ha hahau na malele matea sei tamlohi tari la hitevosahia vara mo řuhu.

¹⁸ Vara ha eři vaia, ha mauri usuri na malele mata tamata peresi na tamlohi tari.

¹⁹ La tapala řuhuřuhu, ha sopo kelekele hin te rani, pani ha sile na masapa isan God vara i eři sile na nona talai lolokoru mata hehe matan la ulia na Retiulia vara,

‘Enau a pa kelea,

enau a pa volira,

enau Moli na lo vereā.’

Deut 32.35

²⁰ Ha vaia sohen harihi:

‘Vara nom meresahi mo marohati,

o vahania,

vara mo mařohu,

o sile te wai isana,

ale matana, i pa mahanuhanu

mata sava mo vaia isam.’

Prov 25.21–22

²¹ Ha sopo tinañihi na hehe vara i jeu kamim, pani ha jeu na hehe na vavahinau řuhu.

13

Ha Oloolo Hin La Haratu La Lo Tauri Na Suiha

¹ Tamlohi rasua tari ha oloolo hin la haratu la lo tauri na suiha, matan mo sopo tea vara i lo toho na suiha vara God mo sopo tinañihira, ale la haratu la lo turu, la turu matan God mo turuhira. ² Matana, sava tamlohi mo leji la haratu God mo taura la tauri na suiha, la lo leji na sava God atu mo vaia, ale la pa lavi na nona talai. ³ Matan tamlohi aulu na jara, la sopo matan vara tamlohi la pa matahunira vara la lo vai na posposi tataholo, pani tamlohi sei la lo vai na sasati la pa matahunira. Vara o vai na hinau tataholo, la pa řuhu isam. ⁴ God mo tau la haratu la lo aulu matan vara la tueniho. Pani vara ko lo vai na hehe, o pa matahu, matan God mo taua na limara vara la pa sileho na nom talai. ⁵ Matana, mo tataholo vara o oloolo, mo sopo mata talai purongo, pani matan vara řomim i tataholo na nahon God.

⁶ Matan hinau sei, mo tataholo vara ha voli na nomim takis. Mania atu i pa tueni la haratu la lo tauri na suiha vara la vai voko atu God mo taua na limara. ⁷ Ha sile na sava ka ave hinia isara, ale ha voli na takis tinatinapua isan la haratu la lo toho vara ha pa volia isara, ha sile na oloolo isan la haratu mo tataholo vara la lavi na oloolo.

Opoia Mo Mařivisi Na Leu

⁸ Ha sopo ave isan tea, pani ave atu enia vara ha pa volia tarea enia vara ha opoiopoi kamim, matan haratu mo opoi na tinapua mo lo mařivisi

na leu non God. ⁹ Na leu non God, retileu matu-
vana la lo toho sohen harihi: o sopo vaivaileu
peresi na tinapua mo lahi moiso, o sopo vilimatei
na tamlohi, o sopo vavanaho, o sopo řomusuri,
peresi te mele retileu tinapua la pisuhi na retileu
matelete purongo sei mara, ‘O opoi na tinapua
sohen ko lo hasem opoiho!’ *Lev 19.18*

¹⁰ Opoia mo sopo vai te hina sati isana tinapua,
ale matana, opoia enia mo mařivisi na leu.

¹¹ Varařuhu ha levosahia vara nake mo sopo
rani mata juruvi řomaliho, matan rani mata juri
mo vejuveju, mo mele mariviti mo jeu rani atu řa
pa tau na nořa rasua hinia tiroma sei. ¹² Pongi
mariviti vara i isoiso, rani juri mariviti vara i pala,
ale řa sopo toho na řořoha, řa pulahi na nořa
posposi sasati, ale řa ru na posposi tataholo sei
mo tai isan God. ¹³ Ra hahau na posposi tataholo
sohen řa lo hahau na malarani, mo sopo hin na
matavuhi mata lavilavi na tinapua, peresi na putu
mata wai, teni posposi viriu, teni řomřomi na hina
lumiha, teni vasvas teni mereimerei. ¹⁴ Pani ha
ru Moli Iesu Křisto na maurimim, ha sopo sile na
masapa vara ha vahani na maurimim na masalo
varama.

14

Haratu La Sopo Rilangi Na Nora Rasua

¹ Ha lavi la haratu řomira la lo kaka vara sava
natu mo tataholo na posposi rasua, ale ha sopo ar-
era na hinau la rasua. ² Tamlohi hai la řomřomia
vara mo tataholo vara la hani na hinau tari, pani
hai řomira la sopo řilangi sohera, la lo hani na
pere pahai purongo. ³ Haratu mo hani na hinau

tari i pa sopo hiteŕesi haratu mo tapuhoro te hanhani, ale haratu mo tapuhoro te hanhani, i pa sopo ari haratu mo lo hani na hinau tari, matan God mo lavia nona moiso. ⁴ Engko hare vara o eŕi ari na volitusi nona tinapua? Nona tamlohi tavera purongo i pa vereea vara enia mo tataholo teni mo vono, ale i pa turu matan Moli i pa eŕi vaia i turu na rani aria.

⁵ Tamlohi hai la řomřomia vara na nahon God rani matea mo mele tapu mo jeu na tinapua mata lotu God, pani tamlohi hai la hitea vara rani tari la sohesohera purongo. Mo tataholo vara tamlohi hatehateahi la hatihia vara sava mo tataholo na řomira. ⁶ Haratu mo sile na oloolo isana rani matea, mo vaia matan vara i sile na oloolo isan Moli. Haratu mo lo hani na hinau tari, mo sile na oloolo isan Moli na nona vere meje matana, ale haratu mo tapuhoro na hanhani, mo tapuhoroa matan vara i sile na oloolo isan Moli, ale mo vere meje isan God. ⁷ Matan mo sopo tea vara i mauri nona hasena, ale mo sopo tea vara i mate nona hasena. ⁸ Vara řa mauri, řa mauri non Moli, vara řa mate, řa mate řa sahe isan Moli, matan haratu, vara řa mauri teni řa mate, enřa non Moli. ⁹ Matan harakerihi natu Křisto mo mate ale mo mele mauri, matan vara i eŕi Moli non la haratu la mate peresi la haratu la mauri.

¹⁰ Engko, mata sava ko ari na voraim, teni vara ko hiteŕesia? Matan enřa tari řa pa turu na nahon God mata aria, ¹¹ matan la ulia vara,

‘Moli mo vereea mara:

Matan enau na lo mauri,
tamlohi tari la pa popovitoho isaku,
ale meme tari la pa taviti isan God.’

Isa 45.23

¹² Matan haratu mo mera purongo vara enā tari řa pa turu na nahon God vara řa řarami na nona aria mata noā vavahinau. ¹³ Matan hinau atu, řa sopo mele sile na talai isařa hatehateahi, pani i pa mele řuhu vara řa hatihia vara řa sopo mele vai te hinau vara i vai na voraiřa tinapua i tialahalaha teni i ori hinia.

¹⁴ Usuri na řomřomi non Moli Iesu, na lo levosahia mo řuhu vara mo sopo te hanhahi mo lumiha vara řa sopo eři hania, pani enia mo lumiha isan haratu mo řomřomia vara mo lumiha.

¹⁵ Vara voraim řomina mo lo sati na sava ko lo hania, ko sopo mele hahau na opoia. O sopo komo haratu Křisto mo mate matana, mata ham hinau purongo. ¹⁶ Ale matana, o sopo sile na masapa isan tea vara i jovi na hehe mata sava ko levosahia vara la pa retisasati hiniho matana, hina purongo vara ko levosahia vara mo tataholo.

¹⁷ Matan sava ko lo hania teni ko lo inua, la sopo aulu hin mauri atu God mo aulu hinia, pani posposi tataholo, tamata peresi avulahi atu la tai isan Tanume Tapu la aulu na mauri. ¹⁸ Hare sei, mo volitusi isan Křisto hin malele sei, God i pa avulahi hinia, ale tamlohi sohena la pa avulahi hinia. ¹⁹ Matan haratu, mo řuhu vara řa tutungui na sava i pa vai na tamata, ale na sava i pa tueni na tamlohi la ulua na nora rasua.

²⁰ O sopo komo na vavahinau non God mata hanhahi purongo, varařuhu hinau tari la voke-voke, pani mo sopo tataholo vara o hani te hinau vara i pa vai na tinapua i jovi matana. ²¹ I pa mele řuhu vara o sopo hani te mit teni o inu te wai řilangi vara i pa vai na voraim i jovi na nona

rasua. ²² Nom rasua enia nom hasem peresi God. Haratu mo vai na hinau matan mo levosahia vara mo tataholo vara i vaia, i pa avulahi matan mo levosahia vara i pa sopo lavi na talai matana. ²³ Pani haratu mo sopo levosahi mamahunia vara sava mo lo hania mo tataholo na nahon God teni mo vono, enia i pa lavi na talai vara i hania matan mo sopo hania usuri na nona rasua, ale sava mo sopo vora na rasua enia hehe.

15

Ha Vai Na Tovongi Ruhu

¹ Enŕa sei noŕa rasua mo řilangi, mo tataholo vara řa tueni la haratu řomira mo sopo řilangi, mo sopo tataholo vara řa hase kilauŕa purongo.

² Mo tataholo vara enŕa hatehateahi řa vaia i řuhu isana tavgaviŕa, řa tuenira la ulua na nora rasua,

³ matan Křisto mo vai na tovongi matea isaŕa mo sopo hase kilaua purongo, pani sohen la ulia vara Křisto mo vereaa isan God mara,

‘Na rani tamlohi la veresatiho, enau na rongo mo sati matana.’ *Psa 69.9*

⁴ Matan sava la ulia tuai la ulia matan vara i pa vujangiŕa, la lo sileŕa na řomtoho, la tahe na řomiŕa na noŕa saovi na řomperavu mata Reti-tapu non God.

⁵ Ale nake na lo usiusi vara God mata řomperavu peresi na tuetueni, i tinaŕihia vara ha řomřomi na tinapua i tataholo hin kamim sohen Křisto Iesu mo lo vaia, ⁶ matan vara kamim mo isoiso na leo matea, ha pa sile na hasohaso tavera isan God Taman noŕa Moli Iesu Křisto.

⁷ Matana, ha avulahi hin kamim hatehateahi sohen Křisto mo avulahi hin kamim matan vara

God i lavi na hasohaso matana. ⁸ Ka levosahia vara Křisto mo sinai sohena volitusi isana Jew, vara i vujangia vara God mo sopo tope na nona reti mo retitauhi hinia isana tama Jew tuai, ⁹ ale matan vara tamlohi řořoha la pa hasohaso God mata nona řomopoia sohen la ulia vara, 'A pa hasohasoho isana tamlohi mara jara tinatinapua, a pa lalavete a tahe na hijam i aulu.'

Psa 18.49

¹⁰ Mo mele vere a na jara tinapua vara,

'Kamim tamlohi řořoha!

Ha avulahi peresi na nona tamlohi,

tavtavuin Israel.'

Deut 32.43

¹¹ Ale mo mele vere a vara,

'Kamim tamlohi sei ka tamlohi řořoha,

ha hasohaso Moli,

ale tamlohi tari

ha tahe na hijana i aulu.'

Psa 117.1

¹² Ale mele vahatea, Isaiah mara,

'Mahapin Jesse matea i pa turu,

enia sei i pa aulu

na tamlohi řořoha,

ale enira la pa lo řomtoho isana.'

Isa 11.10

¹³ Ale nake na lo usiisi vara God sei mo lo sile na řomtoho, i mařivisi kamim na avulahi peresi na tamata na nomim rasua, matan vara na suihan Tanume Tapu nomim řomtoho i pa mařivi savulevule.

Paul Mo Verera Na Nona Vavahinai

¹⁴ Ale la voraiku peresi na vevoraiku, na hase levosahia mo řuhu vara ka lo vai na posposi řuhu isana tinapua, matan ka pete levosahi na sava God mo opoia moiso, ale ha pa eři vere tataholoia

isamim hasemim. ¹⁵ Pani hin te hinau, na lo uliuli řilangi isamim vara ha mele řomřomira, na vaia matan řomřuhu non God enia mo viřoniau, ¹⁶ matan vara a volitusi non Křisto Iesu isana tamlohi řořoha, vara a lavi na Retiřuhu non God isara sohena vavahinau nona přis matea matan vara haratu la tamlohi řořoha la eři tau na nora rasua hin Křisto, la mai sohena malamalai řuhu matea God mo avulahi hinia, ale matan vara i pa vaira la vokevoke na suihan Tanume Tapu. ¹⁷ Hin Křisto Iesu enau a eři hapahapa na noku vavahinau na vaia non God, ¹⁸ matan a pa sopo vere te hinau, pani sava Křisto mo vaia hinia matan vara haratu la tamlohi řořoha la oloolo na Retiřuhu na noku retireti peresi na noku vavahinau, ¹⁹ ale hinia la oloolo mata suiha mata mata-mata peresi na hina mařurahi tavera na suihan Tanumen God, matan vara i tapulo Jerusalem i řalihi i tikeli Illyricum, enau na mařivisi vevuhi na vavahinau mata Retiřuhu non Křisto; ²⁰ ale na tau na řomiku vara a retivujavujangi na Retiřuhu, pani mo sopo na jara sei la pete rongo na hijan Křisto ea moiso, mo sopo řuhu vara a voro na jara nona tamlohi tinapua enia mo pete tapulo voro na vao kalesia tiroma ea moiso, ²¹ pani mo lo usuri na sava la ulia vara,

‘La haratu mo sopo tea la sorahia
isara hin te rani, la pa hitevosahia,
ale la haratu la sopo lo rongo
na sorasorahina hin te rani,
la pa rongovosahia.’

Isa 52.15

²² Vavahinau atu natu, mo horoau vaha visa moiso vara a mai isamim.

Paul Mara I Pa Sivo Jerusalem

²³ Pani nake, matan mo sopo te mele masapa vara a vavahinau hin la jara atu na lo vano hinira moiso, ale matan tuai moiso na opoia vara a pa mai isamim, ²⁴ na lo řomtoho vara na malele vara a sivo Spain a pa rohi kamim, na opoia vara a pa toho peresi kamim mata makomo rani, ale na rani vara a malue, ha pa tueniau na maleleku.

²⁵ Pani nake, na lo sivo Jerusalem, na lavi na silesilea mata mania vara i pa tueni na tapuhi non God atu. ²⁶ Matan tamlohin Macedonia peresi Achaia la avulahi vara la sile te silesilea matan vara i pa tueni na tapuhi tilavono Jerusalem.

²⁷ Enira la avulahi vara la tuenira, ale mo tataholo vara la vaia isara, matan haratu tamlohi řořoha sei la lavi na hina řuhuřuhun Tanumen God mo silea, i pa tataholo vara la ase na nora silesilea mata mania isara Jerusalem. ²⁸ Hin rani atu vara a tau pa mania atu isan la haratu Jerusalem, moiso vara na maleleku vara a sivo Spain a pa rohi kamim. ²⁹ Na levosahia vara a mai isamim, a pa mai na leřuhu non Křisto sei i pa řuhu jea matamim.

³⁰ La voraiku peresi na vevoraiku, na lo usia řilangi isamim na hijan Moli Iesu Křisto, ale na opoia non Tanumen God, ha turu peresiau na nomim usiusi isan God matakū, ³¹ ha usiusi vara i juriau na liman la haratu Judea sei la sopo rasua, ale vara noku vavahinau Jerusalem i pa tataholo na naho tapuhi non God ea, ³² matan vara na masalon God, a pa mai isamim na avulahi, ale řa pa rongo i řuhu jara matea matan a pa toho peresi kamim.

³³ God mata tamata i pa toho isamim mo isoiso, amen.

16

Retioloolo Non Paul

¹ Ale na tau vevoraiŕa nike na nahomim, Deacon Phoebe volitusi mata vao kalesia mata vanuan Cenchreae, ² na opoia vara ha avulahi vara ha lavia hin Moli usuri posposi sei mo tataholo isana tapuhi non God, ale ha tuenia na nona opoia tari, matan enia haŕai tuetueni ŕuhu matea mo tueni na tamlohi matuvana, ale mo lo tueniau sohera.

³ Ha sile na retioloolo isan Priscilla enia Aquila, tapalaku na vavahinau non Kŕisto Iesu, ⁴ enira mariviti la mate matan la lo tueniau, mo sopo enau haseku na lo vere meje isara, pani vao kalesia tari non la haratu la tamlohi ŕoŕoha la vere meje isara. ⁵ Ha sile na retioloolo isan la haratu la lo matavuhi na imara, ha sile na retioloolo isan Epaenetus tamlohi ŕuhu matea sei tamlohi la ŕomŕuhu hinia, enia mo tamlohi tiroma matan Asia sei mo posi mo mai isan Kŕisto mata noku vavahinau. ⁶ Ha sile na retioloolo isan Mary, enia sei mo voko ŕilangi matamim. ⁷ Ha sile na retioloolo isan Andronicus peresi narouna Junias tavgavin Israel, na rani na lo toho na ima ŕilangi enira la lo toho peresiau. Vahaŕule non Iesu la levosahi mamahunira, enira la mai isan Kŕisto tiroma hiniau. ⁸ Ha sile na retioloolo isan Ampliatus, tamlohi ŕuhu matea na opoia hin Moli. ⁹ Ha sile na retioloolo isan Urbanus, tapalaŕa na vavahinau non Kŕisto, peresi Stachys na opoia.

¹⁰ Ha sile na retioloolo isan Apelles, mo turu ŕilangi na rani ŕilangi moiso, ale Kŕisto mo avulahi hinia. Ha sile na retioloolo na iman Aristobulus.

¹¹ Ha sile na retioloolo isan tavgavuiku na vaon Herodion, ha sile na retioloolo isan la haratu

non Moli na iman Narcissus. ¹² Ha sile na retioloolo isan la haʻrai atu la lo vavahinau non Moli, Tryphaena peresi Tryphosa. Ha sile na retioloolo isan haʻrai ʻruhu sei Persis, enia mo vavahinau mo ʻrilangi non Moli. ¹³ Ha sile na retioloolo isan Rufus, viʻoni non Moli, peresi tinana sei, enia mo kilauau sohena natuna matea.

¹⁴ Ha sile na retioloolo isan Asyncritus, Phlegon, Hermes, Patrobas, Hermas, peresi la vorai atu la lo toho peresira. ¹⁵ Ha sile na retioloolo isan Philologus, Julia, Nereus peresi vetasina Olympas, peresi na tapuhi tari sei non God la lo toho peresira. ¹⁶ Ha tapatapai kamim na pungosi mata ooloo, vao kalesia tari non Kʻristo la sile na nora retioloolo isamim.

Isoiso Reti Non Paul

¹⁷ La voraiku peresi na vevoraiku, na lo usia ʻrilangi isamim vara ha lo kilau matan la haratu la pulo patumasa, ale haratu la lo posileji na vujangi tataholo ka lavi moiso, ale ha vahari hinira, ¹⁸ matan tamlohi sohen haratu la sopo volitusi non noʻa Moli Kʻristo, pani mata pangera purongo, ale na nora haruharu peresi na nora retimemeji la lo halu na ʻromin haratu la sopo lelevosahi. ¹⁹ Matan tamlohi tari la levosahi na nomim ooloo, ale mo vaiau na avulahi hin kamim, pani na opoia vara ha lelevosahi na sava mo ʻruhu, ale vara ha sopo tia na hina sasati. ²⁰ Ale i pa sopo tuai God mata tamata i pa putputi Setan na ruhuruhu palomim. Ale ʻromʻruhu non Moli Iesu Kʻristo i pa toho isamim.

²¹ Timothy, tapalaku na vavahinai, mo sile na retioloolo isamim; enia peresi Lucius enia Jason, peresi Sosipater, enira tavitavai i Israel.

²² Enai Tertius, na uli lea nika usuri na sava Paul mo vera isaku, enai sohena, na lo sile na noku retioloolo isamim hin Moli.

²³ Enai Paul na lo toho na iman Gaius, mo lo sile na nona retioloolo isamim, enia sei tamlohi tava sei mo lo tueni na vao kalesia tari nika, ale Erastus, treasurer mata taon tava nika peresi voraiia Quartus, la sile na nora retioloolo isamim.

²⁴⁻²⁵ Ra hasohaso God, enia i efi vai kamim ha rilangi i usuri na noku Retiruhu peresi na retivujavujangi hin Iesu Kristo, i usuri na vujangi mata hina luhu sei God mo jarohia tuai tuai jea, ²⁶ pani nake mo pala, ale na Retiulia sohena provet la ulia tuai la vujangia mo mera isana mara jara tinatinapua tari, mo usuri na retileu non God sei mo lo toho rani tui tui, matan vara i vai na tamlohi la oloolo usuri na malele rasua, ²⁷ isan God enia hasena mo lelevosahi, i pa lavi na hasohaso mata rani tui tui hin Iesu Kristo. Amen.

Tangoa New Testament
The New Testament in the Tangoa Language of
Vanuatu
Le Nouveau Testament dans la langue Tangoa de
Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

89356e5c-df58-558e-9b27-ae0321adb2df